

國朝耆獻類徵初編卷二百三十九目錄

守令二十五

李敬躋

張洲

黃繩先

王紹曾

李仲堅

馮履謙

陸燦

陳鏞

孫萬森

張遠覽

張邦伸

梁彬

劉善謨

陳廷柱
杜珣

陶易
姜忠基

范鶴年
石文成

楊純
沈華

范元琳
夏扶英

王宏曾
叢之鍾

金成華
馬見龍

李策

郝瑗

吳煥彩

子裕中

王瑤

王宸

莫暮

國朝耆獻類徵初編卷二百三十九目錄

宗超海

周士孝

檀萃

黃堂

張玉樹

劉作垣

唐尹

袁承紉

補錄

陳嗣虞

國朝耆獻類徵初編卷二百三十九

通奉大夫前署江西巡撫江西布政使司布政使湘陰李桓輯
守令二十五

李敬躋

李侯名敬躋字翼茲滇之馬龍州人中乾隆丁丑進士需次得將
樂知縣卒於官父盛唐由庚戌進士歷官松茂道觀察使以所部
有犯坐監臨官獲譴戍卜魁卜魁距滇萬四千餘里敬躋三省覲
焉飽風霜涉寒暑遭暴水卒至僕逃馬喪漂沒十餘里附枯木得
活才于沙磧間衣履結穿無人色哀感行路服食之遞引而達戍
所而父責以歸養祖母不容朝夕蓋觀察久戍倚閭之望不得於

子而冀以孫慰也敬躋殷憂兩結呼天搶地謀父生還祈身代不可冀恩赦不得再歸而祖母亡三省父而父老急就一官計納贖而父死敬躋亦以塞上書絕致心疾日鳴鳴作兒嘯未幾死范杰者卜魁人也時年八十餘隸旗籍自觀察抵戍結生死交風雨晨夕時其飢寒垂二十年至以觀察櫬歸京師而閩人吳阿玉者爲余司闢十餘年矣敬躋之任將樂約隨官以事不果及敬躋死而觀察訃亦聞日促余書致范翁歸觀察櫬旣抵都則自請行余感焉於其行也作李侯小傳著范翁終始觀察之義阿玉惓惓李氏之忱俾遺李之子若孫世藏焉

論曰范傳獨行歐傳一行跡其所載類皆貞臣孝子節士信友一

意孤行之九死而不移其素者也悲哉李君其志不遂其目不瞑
矣至若范翁之於觀察生則周其困歿則歸其骨其於君家巨卿
夫何多讓抑豈有所感發而然耶而吳阿玉者循循僕隸之中無
它異人其於李君亦未正主僕之分非有恩義之結也乃一言相
訂若已身許至殷殷於其死父萬里跋涉力歸旅櫬斯其樸誠亦
有足多者焉嗚呼天其藉以伸孝子之志也夫

右小傳周於禮撰

臣等謹將臣等所擬各款恭摺具奏伏乞
聖鑒訓示謹奏

張洲

嗚呼萊峯張君之與余如唐韓宋蘇之同值磨蝎宮也今則生並世而同里也學同師也癸酉鄉試不同榜而同舉省試廷對皆同丁丑也余官廣文二年在翰林七年而君爲邑宰至薨左降學職未上余以此始君以此終皆潦倒終無所就又罔不同也同方同術而好會日淺今年同客膠西談讌者累月而竟恤恤焉問其疾視其含斂諾公子之請而預銘君壙樂未極而生悲尤事理之至常而至奇者也君家武功去雒南五百里末由相識也歲庚午余入關中書院肄業主講者孫酉峯師而君以鄉里負笈從論文會講晨夕觀摩廬自夏首迄秋之半也成進士後君歸班迨守部

需次之時而余已罷歸出入相避動如參商之不相見也君通於
學而蹇於仕初授西粵之修仁再補吳興之德清中間南北奔走
勞苦顛頓者行數萬里歷二十餘寒暑而兩任曾不滿一歲其坎
壈視余尤甚也失意於上官不必調而調不必送部引對而咨
送入都皆非人之所爲而不必致憾於臧氏之子也然君乘寬閒
之歲月薄宦壯遊西至蜀南極瘴鄉往來吳越荆豫以至燕趙而
終老於齊也山海足以供其雕鏤悲愉足以發其精采淬礪而盪
滌之又安知非天之玉汝於成而將以大昌其詩文也文宗八家
而以左史堅其骨詩溯三唐而以騷選疏其氣蓋已裒然成集而
卓乎可名一家者也嗚呼富貴者天之所輕而獨若斯人以名然

於兼得者愈思有以撓敗之如君之抑塞於生前而彰徹於身後人所不忍而造物且或爲之寬假也君幼而穎特長而敦敏與人無町畦而善善則長達於政事綽綽而鬱不得施澤未被於民物爲可悼惜也罷官不歸久客齊魯閒掌嶧縣膠州書院之教十年皆以小阮德閏君爲東道主正身率士經指授者多騰達以去而興學擇師其戴使君如文翁高朕信其匪藉公帑以優給私親也君之疾也妻子護之謹其歿也親賓門弟子哭之哀辦香翦紙陳牲而酌酒者經月不絕尊其教而欽其德固不徒門牆之髦俊也君之名曰洲字萊峰也又自號曰南林也卒之歲丁未爲乾隆五十二年七月二十一日絳甲初周而不至生之辰者兩月也考曰

文學金卣妣楊氏繼母馮氏 覃恩贈封正七品如君階也配康氏系出對山先生以貴且賢得附見也子樹枏縣學生孫照宁樹枏將奉母扶靈輜以歸而奠諸佳城也祖以上世次名行見於西峯先生所爲贈公墓志者不再詳也嗚呼余與君生平遭際十同六七則文筆雖拙而銘君者誠莫余宜儻亦君之志也銘曰
物之用當其無宰官耶迺文儒雲錦段明月珠執經心嶠史腴變齊魯春風敷竹林款帶草紆我之來碁酒娛作元宴丹黃劬事未竟鵬坐隅靈芝殿召而趨神超越樞載塗柳髮道經杖扶武功天社枌榆聽楚些盍歸乎

右墓誌銘辭宁廷撰

黃繩先

君諱繩先字正木黃氏鄞人也唐末有江夏侯晟以禦盜功爲明
州刺史其後屢有聞人於鄞閱二十九世爲君祖曰振齡考曰起
忠皆 贈文林郎君以鄞學生中乾隆十七年 恩科鄉試成乾
隆二十二年進士發爲江西知縣任樂平浮梁兩縣勸事致疾告
歸數月以乾隆三十年九月九日卒於鄞年四十七葬於東湖陳
墅塋父墓左君在江西九年天性仁明強力於政事未明起閱文
書定晨召吏卽發有訟者至當鞠或當往驗視皆不越旬日坐堂
上決事日或十餘案卽作判詞自讀與訟者聽之幕友書吏無從
畱閣以取市與囚言廢屏刑器嘗以至情動之而囚自服有豐城

民余上文之弟爲浮梁人毆死藏其屍訟二十年不決上文乃走
候大駕出陳告事下大吏欲第論上文驚蹕罪君銳意治其冤
自往履毆所於民宅後試掘卽得其弟屍獄遂定嘗謂事乂亂者
非必難察由吏不盡心情翫致也故君所斷本治及上官委治他
縣事百數無不曲當而積勞亦深痼不可痊矣其所去縣民必涕
淚送之數十里浮梁爲之立碑其後浮梁民有爲後令屈抑者走
浙江將訴於君至則君已喪乃悲痛而去夫人張氏生子五定宇
定文定衡定樞定杓定文爲揚州府同知與桐城姚鼐遇於金陵
請補爲君誌時嘉慶十一年距君亡四年矣銘曰

萬姓委命君則眞令煩祛亂靖人安已病嗚呼天不與以齡其貽

以後慶

右墓誌銘姚鼐撰

王紹曾

王太史純鄉出守甯波凡八越月而謫雲南軍前不半歲卒時乾隆己丑十一月二十一日也越九載丁酉始克卜葬君於某阡君同母弟禮科給事中顯曾撰狀率十一齡孤具幣奉狀來以志銘請余手狀淚迸咽不成誦頃之竟讀信乃志曰君諱紹曾字衣聞純鄉其號世居江蘇華亭之張堰後入金山縣故君爲金山縣人我朝族之望於江以南者太倉王氏海甯陳氏而外莫如華亭之王仁廟朝相國文恭公實公會祖文恭公生君祖孝廉諱圖焯孝廉生君考甯國太守諱祖庚妣陳恭人海甯大宗伯陳清恪公子編修諱世侃女也君胚胎前光性習殊眾幼授書百遍乃熟

恥之每黎明入塾門未啟持書跪庭中誦以俟夜漏下四十刻乃已率爲常久之開悟年十七補縣庠生又十年丙子登京兆榜明年成進士改庶吉士庚辰授編修君廣穎疏眉瞻視威重見者憚之少儻負才長而侍甯國公宦遊歷事益練旣通籍掌翰林院事相國梁文莊公少宗伯介文□公咸才君倚如左右手奏君理院事君明斷果銳持公抑私無所撓避同列皆斂手讓王午主雲南鄉試得士多知名者癸未充功臣通考兩館提調甲申充方略館纂修所至以才名壓其曹忌者滋眾時館中人有爲蜚語所中者掌院信之將劾奏君力救得寢眾顧歸獄於君君又倡修院署會駕南幸文□公扈從道卒復騰言君知工興日月不利於介